

FILED

MAR 11 2021

[Signature]
ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

WALUR BEAJA & JACK JORBON,)
)
 Plaintiffs,)
)
 -vs-)
)
 BERNIE HITTO & HANDY EMIL,)
)
 Defendants.)
 _____)
 HARRINGTON DRIBO & ROBINSON ABNER,)
)
 Plaintiffs,)
)
 -vs-)
)
 JACK JORBON, ALEE JORKAN,)
 & CANSEE JORKAN ALIK,)
)
 Defendants.)
 _____)

CIVIL ACTION CASE NO.2003-059/
CIVIL ACTION CASE NO. 2017-226

**UAK IM KOLMENLOKJEN EO AN
COURT EO AN MANIT (TRC)**

RO UWAAN PANEL EO: Chief Judge Grace Leban
Associate Judge Nixon David
Associate Judge (Pro Tem) Milton Zackios

JIKIN RONJAKE EO: Majuro Courthouse

RAAN IN RONJAKE: January 22, 24, 27, 28, 29, 30, 31, 2020;
February 4, 5, 7, 10, 11, 12, 13, 14, 17, 18, 19, 20, 21, 25, 26, 27,
28, 2020;
March 3, 10, 11, 12, 13, 16, 20, 23, 24, 31, 2020;
April 6, 2020

IAKWELEL KO IKOTAAN PARTY KO:

Party kein rej jimor erra bwe Aiboj weto, Bikej Island, Kwajalein Atoll ej Morjinkot non Laemokmok jen Irojlaplap Laninbit.

Ilo naan in iakwelel ko an Riabnono Walur Beaja im Jack Jorbon, rej ba bwe Aiboj weto, Bikej ej Morjinkot non Laemokmok eo ear lelok non kora eo jatin, Liriwa. Rej bareinwot ba bwe Aiboj weto, Jabwor ej Katleb non Liriwa. Kin menin, ej iakwelel eo aer in bwe Aiboj, Bikej ej imon bwij jen Liriwa. Riabnono Beaja im Jorbon rej bareinwot ba bwe Nebun im ro bwijin rar kaliaik er ilo an kar wor juon *bwilok* Nebun ear komane ke ear balele iben leo wulaben, Lareneo. Im bwe Walur, eo ej jen bwij eo eritto tata, ilo tore in ej e eo ekkar im jejjot bwe en kabjor maron eo an Alab ilo Aiboj, Bikej Island, Kwajalein Atoll, im Jack Jorbon ej e eo ekkar bwe en kabjor maron eo an Senior Dri Jerbal ilo weto in kenono kake.

Ekkar non Riabnono Harrington Dribo im Robinson Abner, Aiboj weto, Bikej eoktak jen Aiboj weto, Jabwor, enwot ke Aiboj ilo Jabwor ej jikin leo belen Liriwa nae etan Lobo, im ejab jikin Liriwa. Rej ba bwe Aiboj weto, Bikej ej jikin Liriwa. Ilo naan in iakwelel kein an Harrington Dribo im Robinson Abner, rej ba bwe maron ko an ro uwaan juon bwij ak bamle, remaron kajjtokjaer ak tumi, elane rar jab jerbali ijilok ko an Iroj eo, ekkar non mantin Majol im ej enin wawen eo ear walok ilo Aiboj weto, Bikej. Rej bareinwot ba bwe Laemokmok ear lelok Aiboj weto, Bikej non Liriwa, kora eo jatin enwot juon *imon aje* im bwijin Liriwa rar jolet jene. Jet ien tok alik, ear wor *bwilok* ak *tum* ko im Irojlaplap Lojelan Kabua ear Katleb e lok jikin in non Abner ilo 1955 eo, im tore eo in ear jemlok maron ko an ro bwijin Liriwa, ijelokin wot Abner im ro bwijin. Ej bareinwot juon an Riabnono rein, Harrington Dribo im Robinson Abner naan in iakwelel bwe iumin 27 iio ko Abner ear kabjor maron ion Aiboj weto, Bikej, ejelok en ear jumaiki.

Ilo melele ko an Riabnono Alee Jorkan im Cansee Alik, rej ba bwe ke Laemokmok ej kemaron Liriwa ion Aiboj weto, Bikej, ear *Morjinkot* wot im ear jab oktak tok non rainin. Rej bareinwot

ba bwe *Kareo* im *Katlep* rejab maron ukot *Morjinkot*, im bwe ejabwe kein kamol ko ke ear wor *Katlep* jen Irojlaplap Lojelan Kabua non Abner. Alee Jorkan im Cansee Alik rej ba bwe Abner ear win i case eo an nae Jibke kin *Morjinkot* im jab kin *Katlep*.

Rijumae Abnono Bernie Hitto im Handy Emil, rej ba bwe rein rej bok kunaer ilo case in rainin rar jab bok kunaer ilo iio lonlon ko case in ear koman, im bwe rar ber ia. Hitto im Emil rej bareinwot ba bwe rejab claim ke er eo rej kabjor maron ko an Alap ak Senior Dri Jerbal ion Aiboj weto, Bikej Island, Kwajalein Atoll. Ijo wot ke, enwot kemlet ilo jemlok eo an Judge Tuttle im enwot ilo jemlok eo an TRC panel eo lok imaan, ewor aero maron enwot jet uwaan bwij in im rar maron kar kile erro bwe ren wonmanlok kin case in ilo etan ro telokior. Rej bareinwot ba bwe ear ejelok *Katlep*.

KAJITOK KO KAR LETOK NON TRC:

1. Won eo ikotaan Walur Beaja, Alee Jorkan, im Harrington Dribo, im Bernie Hitto, ekkar im ejimwe bwe en kabjor maron eo an Alap ion Aiboj Weto, Bikej Island, Kwajalein Atoll?
2. Won eo ikotaan Jack Jorbon, Cansee Alik, Robinson Abner, im Handy Emil, ekkar im ejimwe bwe en kabjor maron eo an Senior Dri jerbal ion Aiboj Weto, Bikej Island, Kwajalein Atoll?
3. Elane Traditional Rights Court eo enaj kalikar bwe Bernie Hitto ejab ekkar im jejjot bwe en e eo ej kabjor maron im jimwe ko an Alap ion Aibwij weto, Bikej Island, Kwajalein Atoll, inem ekkar non mantin Majol, ejimwe ke bwe Bernie Hitto im Handy Emil ren bok wonen aerro kar wonmantak kake High Court Civil Actions 21-80 im 1986-149 im bareinwot appeal ko ilo case kein?

UAK KO:

1. Walur Beaja.
2. Robinson Abner.

3. Ekkar non mantin Majol, ro imaan bwij eo-enwot Alab eo, ej an eddo non lale im kojbarok aenoman im jokane eo an bwij eo. Ej bareinwot etal jokjok in non eo ej imaan Dri Jerbal ro ak Senior Dri Jerbal eo. Kolmenlokjen eo an Panel in ej bwe ro watok er bwe rej er eo ekkar bwe ren kabjor maron an Alab im Senior Dri Jerbal ion Aiboj weto, Bikej Island, Kwajalein Atoll, renaj na an rein rar edroik case in, im ko imaanlok ilo etan bwij eo im nukun ko, enwot ke Manit eo in, ej kautej dron im jela nae dron, enwot an kokadede ko ba, *enra bwe jen lale rara; kandrikdrk kin iakwe; drik wot jej*; ko im jej joleti rainin jen ro lok imaan im rej kwalok kajur in jemdroneo an juon bamle ak juon bwij elane ej berber wot ilo mantin kautej im jela nae dron.

MELELE KO REMOL IM KALMENLOKJEN IM UAAK EO EJ BEDBĒD IOER:

Elkin an panel in an TRC ronjake aoleb melele ko an rikamol ro im kein kamol ko jakimantak ilo ien ronjake ko, panel in ear maron jimor erra kin uak kein enwot aer walok ilo jemlok in. Ilo kar kwelok eo an panel in elkin wot an kar jemlok ien ekajet eo, ilo tore eo Presiding im Chief Judge eo an TRC, Honorable Walter K. Elbon, ear eman wot an mour im kolmenlokjen, rar erra kin uak kein. Mokta jen an kar dredrelok je jemlok in ear jako late Chief Judge Elbon ilo juon ien eo ejidrimkij. Kin menin ear etal ijiton eo ilo erra an aoleb party kein bwe Pro Tem Acting Associate Judge Milton Zackios en bok jikin late Judge Elbon. Alkin an Judge Zackios etale kein kamol kein ilo tiljok im jejjot, panel in ear bar wonmanlok wot im kwelok im ear bar erra eja ilo uak kein wot ilo jemlok in an TRC panel eo ear ber ilo ien ronjake ko. Im uwak ak kolmenlokjen eo an TRC panel eo ej berber wot ion melelein kein.

Party kein aoleb rej erra bwe Aiboj weto, Bikej Island, Kwajalein Atoll, ej juon ian Morjinkot ko an Laemokmok jen Irojlaplap Laninbit. Ear ejelok melele kin tore ta Morjinkot eo ear bok jikin, ak court in ej melele bwe Morjinkot ej ajej eo ilontata im auroktata an juon Iroj non juon kajur eo ear beran ilo tarinae im boktok anjo non Iroj eo enwot an alikar ilo book eo an Irojlaplap im President Amata Kabua. Panel eo ej melele bwe *Morjinkot* ej maron oktak wot kin un ko relap, einwot ko emoj bar kolajraki ilo book in an Irojlaplap im President Amata Kabua. (Kabua, 1993)

TRC Panel eo ej erra bwe Aiboj weto, Bikej ej *Imon Bwij* kio, enwot an lajrak laltak jolet in maron ko ie iben rein bwijin Liriwa. Einwot ke ekkar non kein kamol im naan in kamol ko ilo case in, einwot Plaintiffs' Exhibit Dribo P5, Abner ej kwalok ke alkin an kar Lojabkij alab, ear etal maron eo non jinen Abner, Liwabat, enwot ke e wot eo ear mour ian ro ilo ebeben eo an ilo tore eo. Ej bareinwot alikar ilo Affidavit eo an Kotmene Abner, Plaintiffs' Exhibit P-10, enwot an ba ke ekkar non melele ko an (Kotmene), ro bwijin Nebun rej Alab im ro nejin Abner rej Dri Jerbal ilo tore eo.

Riabnono Harrington Dribo im Robinson Abner rej ba bwe Irojlaplap Lojelan ear *Katlep* e Aiboj weto, Bikej non Abner, ilo an kar lelok jaje eo non Abner bwe en rakij Bikej. Ej bareinwot melele eo an Ri-Abnono Harrington Dribo im Robinson Abner in bwe *Katlep* ear bok jikin *Morjinkot*. Court in ej tomak bwe aet, Irojlaplap Lojelan ear lelok jaje eo non Abner bwe en etal im rakij Aiboj weto, Bikej, botab ejab non *Katlepe*. Ilo naan in kamol ko an Herring Dribon ilo ien ronjake eo an case in ilo February 27, 2020, ear ba bwe ejab Abner wot ear etal jaje non raro ilo Bikej, ak Irojlaplap Lojelan Kabua ear bareinwot lelok jaje non lellap eo jibun, Abner im ro jet rej ber ion Bikej tore eo non aer rakiji. Panel in ej kile bwe Iroj eo ej Katlepe bwidrej eo non juon eo ej uwaan ak emaron jab uwaan bwij eo, im ilo tore eo ej komane katlep eo ej komakut aoleb ro ilo bwidrej eo katlepe. (Tobin, 1956) Panel eo ej melele bwe Irojlaplap Lojelan ear jab komakut armij ro rar ber ion Aiboj weto, Bikej, im wawen in ej alikar ilo naan in kamol ko an rikamol William Briand eo ear kamol non Riabnono Beaja im Jorbon, im ear kwalok ke tore ko ej ladrik wot ekin etal iben ro jet ilo bamle ko an Liriwa non Aiboj weto, Bikej. Panel in ej bar kile ke ear ejelok katlep ear koman enwot an ejelok ilo jeje non kamol, im bareinwot an alikar ilo affidavit ko an Kotmene Abner, Plaintiffs' Exhibit P-10, affidavit eo an Mathrine Abner, Defendant's Exhibit 11, im naan ko an Abner make, Plaintiffs' Exhibit Dribo P-5. Aoleb melele kein ilo kajojo paper kein rejab ba jabdrewot ke ear wor juon katlep ear bok jikin ilo Aiboj weto, Bikej.

Panel in ej bareinwot kile bwe ilo an ro jet ilo bwij ko reritto lok ber tok wot ilo Jaluit, im ijoko jet, Abner eo ear ber ion Kwajalein Atoll, im e eo ekkar bwe Irojlaplap Lojelan en kile im kemarone kin jaje eo bwe en bok maron eo an Alab einwot ke *berber ijin, berber ijon*. Ro jet

reber tok wot Jaluit im ijoko jet, ak Abner eber im bok maron ilo etaorwoj aoleb ilo tore eo an. Wawen in ej alikar ilo Civil Action 2000-080, Kios vs. Kios, enwot an ba bwe mene juon enaj jako jen ien ko rellab an juon bamle, einwot mij, ej jab melelein bwe maron ko an renaj jako ak eban jolet maron ko ekkar non manit. Ej bar alikar wawen in ilo Civil Action 2003-122, Tibon vs. Molik vs. deBrum.

Ikijen elane ear wor bwilok ak jab, panel in ear jab loe ke ebwe kein kamol ke ear wor bwilok. Elane ear wor bwilok ilo maron ko ion Aiboj, Jabwor, Jaluit, inem kajitok ko litok non panel in rejab jelet Aiboj, Jabwor, ak rej jelet wot Aiboj, Bikej: Panel in ear bar etale melele ko an Kotmene Abner ilo kar Civil Action 21-80, ak Plaintiffs' Exhibit P10, eo ej kalikar bwe Kotmene ear kile lellap ro jinen einwot Lijileej im Nebun enwot jet ro rej uwaan wot bwij eo an Liriwa, im ejelok ilo melele kein an ke ear wor *bwilok* nae lellap ro jein Abner.

Alkin aoleb melele kein ke Aiboj weto, Bikej ej imon ro bwijin Liriwa, Panel in ej bar kalimjoke menmenbwij kein ruo kar kadreloni ilo case in enwot, Plaintiff's/Intervenor Exhibit B, Menmenbwij An Bwijin Liriwa, im Plaintiffs' Exhibit P-1, Menmenbwij An Nejin im Bwijin Laemokmok. Ilo case in ewor jilu armij ro rej ba bwe er eo ekkar im jejjot bwe ren bok maron in Alab ilo Aiboj weto, Bikej ilo tore in, im armij rein rej, Walur Beaja, Harrington Dribo, im Alee Jorkan.

Mekarta Harrington ej nejin kora ilo ebeben eo an, ak ej jibun Abner, inem ejejot bwe lajrak eo en wonlaltak wot iben bwij eo enwot ke ejanin lot. Itok kio non Alee Jorkan, e ej juon kokajriri an Carl eo jibun Nebun. Ear jab alikar won ro rej lukun jinen ak jemen Jorkan. Ekkar non Manit, kokajriri enaj jolet elane enaj maat ajri ro nejin bwij eo, im bareinwot maat ro nejin botoktok eo. Botab ilo tore in ear toor botoktok jen Abner laltak non leo nejin eritto, Kotmene im kio ej leo nejin, Robinson Abner. Kin menin, ej alikar ilo lajrak kein ilo menmenbwij kein ruo bwe Walur Beaja ej e eo ejejot im ekartata ilo lajrak in ro bwijin Liriwa bwe en kabjor maron an Alab ilo tore in, enwot ke ejanin lot bwij eo an Limaile laltak non Lijileej eo nejin Limaile, laltak wot non Agnes eo nejin Lijileej, im kio etobar Walur eo nejin Agnes.

Itok kio non won eo ejejot im ekkar bwe en kabjor maron an Senior Dri Jerbal iben rein bwijin Liriwa. Muktata, Jack Jorbon ej juon ebeben driklok jen ebeben eo an Cansee im Robinson im eban ella jen ebeben eo mokta jen e. Ikijen Cansee Jorkan Alik, enaj aikuj kottar an botoktok eo lot enwot ke ear toor in botoktok jen Abner non Kotmene im ilo tore in non Robinson. Kin menin, jej watoke bwe botoktok eo kein karuo eber iben Cansee bwe mekarta ej nejin emaan, ak jemen Cansee ej bwij enwot ke ej nejin kora. Inem court in ej kile bwe Robinson Abner ej e eo ekkar im ejimwe bwe en kabjor maron eo an Senior Dri Jerbal ilo Aiboj weto, Bikej Island, Kwajalein Atoll.

Kin menin TRC Panel eo ej erra bwe kinke Aiboj weto, Bikej Island, Kwajalein Atoll ej imon ro bwijin Liriwa, inem ejimwe im jejjot bwe maron eo an Alab en etal non Walur Beaja ilo tore in, im maron eo an Senior Drijebal en etal non Robinson Abner ilo tore in.

MANIT IM IMINENE KO REJELET CASE IN:

1. **Morjinkot**- An juon Iroj lelok juon ak elonlok weto ak aeto non juon ian ritarinae ro an im ear beran ilo tarinae. An beran ear walok ilo an kar katorak madre kin enbwunin make bwe madre ko ren jab jelet Iroj eo ilo ien tarinae im ej wonen botoktok in maan madre.
2. **Berber ijin berber ijon** – Jej juon wot mekarta iber ijin ak kober ijo etolok.
3. **Katlep** – Iroj eo ej katlepe juon kajur ion juon jikin im aolep armij ro rar ber im jokwe ilo jikin eo mokta lok renaj aikuj emakut. Kin menin, ilo an juon Iroj bok juon jikin non an katlepe bar juon armij ie, ejab melelein bwe ej kaje armij eo juon kin jabdrewot bwor ear komone, ak ej na jikin eo ejelok jikin.
4. **Bwilok/Tum** – Bok maron ko an juon armij ak bwij jen bwidrej kin un ko rellab im ekkar non manit.
5. **Imon Aje** – Elane juon Iroj ak Alab, ilo an karon bwij eo, ej ajelok bwidrej eo non juon eo emaron ak emaron jab uwan bwij eo.

KEIDI MANIT IBEN MELELE KO REMOL:

Ej alikar ilo case in ke Aiboj weto, Bikej Island, Kwajalein Atoll ej juon *Morjinkot* jen Irojlaplap Laninbit non Laemokmok, im tok alik Laemokmok ear lelok *Morjinkot* in an non kora eo jatin, Liriwa, im ear wonlaltak wot non ro bwijin Liriwa im non rainin *Morjinkot* in an Laemokmok ej lajrak laltak ilo bwij eo an Liriwa.

Mekarta ne bwij eo ear ajerer ibelakin ailin kein ad im jet rar ber ilo Jaluit im jejjo ion Kwajalein, ak *ke berber ijin berber ijon*, Abner im ro rar ber ion Aiboj, Bikej, Kwajalein Atoll rar ber ilo etan bwij eo. Irojlaplap Jeimata, im tok alik, Irojlaplap Lojelan, rar komaron Abner non an juon aer Alab, enwot an alikar ilo Plaintiffs' Exhibit P10, ak Affidavit eo an Kotmene Abner.

TRC Panel eo ej kile bwe Aiboj weto, Bikej ej juon imon bwij im bwe ejabwe kein kamol non kalikar ke Aiboj weto, Bikej kar Katlepe lok non Abner. Ear walok melele in ilo naan in kamol ko an Riabnono Harrington Dribo im Robinson Abner, im rikamol ro an, botab ilo naan ko an lollap eo jimaan, Abner (Exhibit Dribo P5), im ko an ritto ro jemen im jinen, enwot Kotmene (Exhibit P10), Kunar (Exhibit D13) im Mathrine (Exhibit D11), ejelok ijon ej kalikar ke weto in ej juon *Katlep*.

TRC Panel in ej kile bwe ear jabwe kein kamol ko non kalikar ke ear wor *bwilok ak tum* ko rar walok ion Aiboj weto, Bikej.

RIKAMOL RO:

1. RIKAMOL AN RIABNONO WALUR BEAJA IM JACK JORBON

- a. William Briand
- b. Esther Kelen
- c. Romeo Olson Jorbon
- d. Belmar Graham
- e. Helkena Anni

2. RIKAMOL AN RIABNONO HARRINGTON DRIBO IM ROBINSON ABNER

- a. Harrington Dribo
- b. Helkena Anni

- c. Herring Dribon
- d. Bill Labija
- e. Robinson Abner

3. RIKAMOL AN RIABNONO ALEE JORKAN IM CANSEE ALIK

- a. Baneb Bikajela
- b. Tison Dick
- c. Cansee Jorkan Alee

4. RIKAMOL AN RIJUMAE ABNONO BERNIE HITTO IM HANDY EMIL

- a. Hersa Nemra
- b. Handy Emil
- c. Neiran Anuntak

KEIN KAMOL KO:

1. KEIN KAMOL AN RIABNONO WALUR BEAJA IM JACK JORBON

- a. Plaintiff's Exhibit P1 – Menmenbwij An Nejin im Bwijjin Laemokmok (Lajidrik
- b. Plaintiff's Exhibit P2 – Menmenbwij eo an Ri-Liriwa im Ro Dron
- c. Plaintiff's Exhibit P3 – Menmenbwij eo an Ri-Liriwa im Ro Dron
- d. Plaintiff's Exhibit P4 – Menmenbwij an Liriwa Laltak non Jiokbed, Jabkoj, & Lareneo im ro Bwijjeor
- e. Plaintiff's Exhibit P5 - Menmenbwij an Likalleb im Ro Bwijjin
- f. Plaintiff's Exhibit P6 – Menmenbwij an Laimokmok non LiRiwa
- g. Plaintiff's Exhibit P7 – Menmenbwij an Liwabat im Ro Bwijjin
- h. Plaintiff's Exhibit P8 – Menmenbwij an Nebun im Ro Bwijjin
- i. Plaintiff's Exhibit P9 – Special Power of Attorney of Walur (6/4/2015)
- j. Plaintiff's Exhibit P2a – Menmenbwij of Liriwa (Page #1)
- k. Plaintiff's Exhibit P3a – Menmenbwij of Libokni (Page #2)
- l. Plaintiff's Exhibit P4a – Menmenbwij of Libokni (Page #3)
- m. Plaintiff's Exhibit P5a – Menmenbwij of Libokni (Carl to Alee)
- n. Plaintiff's Exhibit P6a – Menmenbwij of Libokni (Jiokbed to Kobin/Abner to Harrinton/Page #5)
- o. Plaintiff's Exhibit P7a – Menmenbwj of Libokni (Lalita to August/Lisos)
- p. Plaintiff's Exhibit P8a – Notarized Hand-Written Letter of Litha Lalita (01/22/2020)
- q. Plaintiff's Exhibit P9a – Menmenbwij of Libokni (Lalita to August/Abner to Robinson & Handy)
- r. Plaintiff's Exhibit P10 – Affidavit of Kotmene Abner in CA21-80 (2/1/385)
- s. Plaintiff's Exhibit P11a – Menmenbwij of Lobo & Liriwa with Texts Omitted
- t. Plaintiff's Exhibit P11a – Menmenbwij of Lobo & Liriwa with Texts Intact

2. KEIN KAMOL AN RIABNONO HARRINGTON DRIBO IM ROBINSON ABNER

- a. Plaintiff's Exhibit Dribo P2 – Records and files of the Land Registration Authority (6 pages)
- b. Plaintiff's Exhibit Dribo P3 – Customary Titles & Inherent Rights, Kabua
- c. Plaintiff's Exhibit Dribo P4 – Atoll Research Bulletin #11; Land Tenure in the Marshall Islands, Tobin
- d. Plaintiff's Exhibit Dribo P5 – Leta an Abner (9/82)/translation 2/19/20)
- e. Plaintiff's Exhibit Dribo P6 – Documents Offered in Support of Motion For Continuance of Trial Setting in this Matter (11/5/01)
- f. Plaintiff's Exhibit Dribo P7 – Menmenbwij eo an Laimokmok
- g. Plaintiff's Exhibit Dribo P8 – Etto Non Raan Kein – A Marshall Islands History
- h. Plaintiff's Exhibit Dribo P9 – Memo kin Ajej Money eo an Mid Corridor Atolls, Kwajalein (12/21/76)
- i. Plaintiff's Exhibit Dribo P10 – CA 21-80 and 1986-149 Consolidated Judgment
- j. Plaintiff's Exhibit Dribo P11 – Certification (2/17/20)
- k. Plaintiff's Exhibit Dribo P12 – Certificate of Death for Mebur

3. KEIN KAMOL AN RIABNONO ALEE JORKAN IM CANSEE JORKAN ALI

- a. Plaintiff's Exhibit A (Alik/Jorkan) – Menmenbwij of Likbad
- b. Plaintiff's Exhibit B (Alik/Jorkan) – Menmenbwi of Liriwa

4. KEIN KAMOL AN RIJUMAE ABNONO BERNIE HITTO AND HANDY EMIL

- c. Defendant's Exhibit D1 - Kabua Kabua's Statement 1985
- d. Defendant's Exhibit D2 – Imata 1995 Dismissal Request
- e. Defendant's Exhibit D3 – Amata 1985 Sato
- f. Defendant's Exhibit D4 – Aronto Lobo's Affidavit 1985
- g. Defendant's Exhibit D5 – Menmenbwij
- h. Defendant's Exhibit D6 – Horizontal version of D5
- i. Defendant's Exhibit D7 – Special Power of Attorney from Imata
- j. Defendant's Exhibit D8 – Listing of Church Collection
- k. Defendant's Exhibit D9 – Updated Listing of Kwaj Alabs
- l. Defendant's Exhibit D10 – Affidavit of Kotmene
- m. Defendant's Exhibit D11 – Matrine Abner's Affidavit
- n. Defendant's Exhibit D12 – Iroj Book by Michael Kabua
- o. Defendant's Exhibit D13 – Luckner's Affidavit
- p. Defendant's Exhibit D14 – TRC's Opinion

MELELE KO JET PANEL EO EJ KILE KE REKKAR NON AER KWALOK:

Court in ej kile maron eo an Irojlaplap eo an Aiboj weto, Bikej Island, Kwajalein, kin an kar komaron party kein non aer itok kin kajitok kein aer non jikin ekajet ko. Ijo wot, ke TRC panel in ej tomak naan in ke Iroj im jela im kotmene bwe er wot remaron kobaik kajur rein droer ilo

Aiboj weto, Bikej Island im bukot ijo emantata non an rein droer maron jokane im aenoman kin maron ko aer ion bwidrej kein an Iroj ro. Im bwe kajur rein droer ilo Aiboj weto, Bikej Island, ren bar einwot jela nae Iroj ro aer im maron kojbarok weto in im jerbale aoleb ijilok ko an Iroj ro jen ien non ien, einwot ke Manit eo in bwe jen kautej dron im jela nae dron.

Raan: March 10, 2021



Grace L. Leban
Chief Judge, TRC



Nixon David
Associate Judge, TRC



Milton Zackios
Pro Tem Associate Judge, TRC